



Buca mo ella Sala Peter Kaiser dalla claustra a Mustér han ins tedlau las discussiuns pertuccont ovras fotovoltaicas. Igl arranschament ei vegnius emess online.

FOTO STEFAN SCHWENKE

Evitar vias puleinas

Grondas ovras fotovoltaicas projectadas egl intschess alpin dat ei tuttenina tut a dubel. Buca da far curvien ch'il «Discuors dalla perscrutaziun d'energia» a Mustér ei sefatschentaus cun quella tematica. L'occurranza publica dalla gievgia vargada ha presentau pliras vestas sin ina tecnologia che fatschenta politica e publicitad.

ANDREAS CADONAU/FMR

«Nus stuein anflar la via la pli raschuneivla», ha Boris Previšić getg la gievgia vargada al «Discuors dalla perscrutaziun d'energia» ch'ei seradunau questa jamna a Mustér. Il menader digl Institut uranes dallas culturas dallas Alps dalla universitat da Lucerna ha getg ch'ins stoppi evitar: «Da caminar sin vias puleinas.» Boris Previšić ha annunziàu ella Sala Peter Kaiser dalla scola claustrala vestas che tematischeschan la produziun d'electricitad via indrezs fotovoltaics grondas piazzai sin spundas alpinas suleglivas. Projects per ovras fotovoltaicas egl intschess alpin svizzer dat ei en abundanza, sco quei che Marius Schwarz ha tradiu.

Planisau ei dabia

Marius Schwarz e sia equipa dalla Scola politecnica federala sefatschentan intensivamein cun ovras fotovoltaicas grondas che duein producir ina part dil current che maunca alla Svizra principalmein durant igl unviern. «La survesta contas ovras grondas ch'ei momentanamein planisadas havein nus buc.» Ella «Neue Zürcher Zeitung» ei vegniu scret da varga 40 projects, gi Marius Schwarz. «Nus dalla Scola politecnica federala essan sefatschenta pli intensivamein cun ovg projects.» Tenor las explicaziuns da Marius Schwarz pon quellas ovg ovras contribuir essenzialmein alla munconza d'energia durant igl unviern. «Per construir

quellas ovg ovras drova ei ina surfatscha da 12 km quadrat.»

Integrar ella cuntrada

Co integrar quellas ovg ni la finfinala 40 ovras solaras grondas ella cuntrada alpina ei silmeins entochen ussa stau negin tema. Da quei meini ei Sarem Sunderland che sefatschenta alla Scola politecnica federala cun la damonda co ins ha integrat ils lags da fermada ella cuntrada. La cuntrada ei numnadamein: «Ina resursa publica.» Avon varga 60 onns eran ins forsa buca ton perscharts da quella resursa publica. Sarem Sunderland ha getg ch'ins hagi gia antruras argumentau ch'ils lags da fermada enriheschian il maletg dalla cuntrada. Ed el ha presentau entgins lags artificialis nua che quella integraziun ella cuntrada ei era reussida. Plidentau ha il scienziau dalla Scola politecnica federala era la viafier transalpina. «Cun construir la NEAT han ins investat bia lavur e bia daners per mantener il maletg dalla cuntrada.» Sarem Sunderland ha presentau exempels co ils inschigniers han deponiu il material cavau ord il tunnel. «Ei dat senz'auter exempels ch'igl ei reussiu d'integrar infrastruttura ella cuntrada.» Sarem Sunderland constatescha e deplorescha ch'ins ha en quei grau tralashau da tematisar las ovras grondas dalla fotovoltaica.»

La cuntrada turistica

«Ei dat biaras retschercas turisticas e tuttas dattan la medema risposta.» La risposta sin la

damonda daco che turistis e turists fan vacanzas en Svizra ha Aurelia Kogler purschiu la gievgia vargada ella Sala Peter Kaiser. «La natura ed il maletg dalla cuntrada ein il motiv principal per carmalar turistis.» Per Aurelia Kogler che sefatschenta alla Scola aulta specialisada grischuna cun damondas dalla economia turistica eis ei clar: «Che la cuntrada ei era ina cuntrada turistica.» Secapescha che la reclama dallas organisaziuns turisticas ei fermamein colligiada cun maletgs dad ina cuntrada intacta. La scienziada ei pertscharta che l'egliada turistica e l'egliada indigena sin la cuntrada sedifferenzieschan. «En loghens cun dabia infrastruttura turistica ei la populaziun pli aviarta viers indrezs fotovoltaics.» Entochen ch'ils indrezs fotovoltaics grondas spisgant la reit cun electricitad pudess ei denton aunc cuzzar in amen. Da quei meini ei en scadin cass Marius Schwarz. «Entochen igl onn 2025, sco quei che la lescha d'energia federala prevesa, vegn ei strusch ad esser realistic.» Ella discussiun ha il specialist per damondas d'energia aunc plidentau ina ni l'atra nusch ch'ils amaturis dallas ovras fotovoltaicas grondas ston smaccar. «Arcunar l'energia ei in impurtont tema per ulivar la produziun malregulata.» Il sulegl glisha numnadamein era ellas Alps buca durant 365 gis ad onn. La via raschuneivla para aunc dad esser empau ella nebla. Il «Discuors dalla perscrutaziun d'energia» a Mustér ha denton alzau empau igl umbrival da nebla.

Copresidi tgamuna la PPS Surselva

La secziun Surselva dalla PPS dil Grischun ei s'entupada a Glion a sia radunanza generala. A caschun da quella ha ella elegiu sia suprastanza. Serafin Caminada da Lumbrin e Silvio Schmid da Sedrun meinan da niev comunablamein la partida.

AUGUSTIN BEELI/FMR

Suenter il success digl onn vargau vul la secziun Surselva dalla partida populara svizra (PPS) rinforzar sia posiziun ella regiun. Mesjamna sera, a caschun dalla radunanza generala, ha la PPS Surselva elegiu da niev sia suprastanza. Gl'onn 2022 hagi ella astgau selegrar d'in grond success allas elecziuns dil Cussegl grond, la partida seigi ida cun nulla sez e hagi gudignau gest dus. Quella situaziun da partenza ha la radunanza priu sco basa per renovar e rinforzar sias structuraz. «Sco victura dallas elecziuns cantunales vul la PPS surprendre responsabladad e prender ina rolla activa pil beinesser e prosperar dalla Surselva», scriva la PPS Surselva en sia comunicaziun da medias.

Serafin Caminada e Silvio Schmid

Da niev meina in copresidi la secziun, cun dus presidents, da duas regiuns e da duas generaziuns. Cul president d'entochen ussa, Serafin Caminada, da Lumbrin, tgamuna da niev Silvio Schmid da Sedrun la PPS Surselva. Ulteriurs commembers da suprastanza ein Jessica Zimmermann da Surcuolm, ella ei respon-



La suprastanza nova dalla PPS Surselva, davos da sen. a dretg Renatus Casutt, Annemarie Spescha, Silvio Schmid, Serafin Caminada, Sascha Tischhauser, Martin Sgier e la referenta Valérie Favre Accola. Davontier Jessica Zimmermann e Gieri Flurin Darms.

FOTO MAD

sabla per las finanzas, Gieri Flurin Darms da Glion fa il secretariat, Annemarie Spescha da Mustér s'occupa dil protocol e da translaziuns e Sascha Tischhauser da Glion ei responsabels pils commembers. Ils dus deputai el Cussegl grond, Martin Sgier e Renatus Casutt, cumple-

teschan la suprastanza. A caschun dalla radunanza ha la deputada e vicepresidenta dalla fracziun parlamentara, Valérie Favre Accola, dilucidau ils problems dallas regiuns da muntogna ed analisau las schanzas dalla PPS en regiuns periferas.

GLION

Niev team per l'ortopedia al Spital regional

Il diember da cass ei carschiu fermamein ils davos onns. Perquei ei il Spital regional Surselva sedecidiu d'engrondir sia partiziun per ortopedia e medischina da sport. Sut la direcziun da Sebastian Ulsamer ei il team da miedis cumplets dapi igl 1. da schaner 2023.

«Nus selegrein da comunicar ch'il team da miedis ei cumplets dapi l'entschatta digl onn cun l'entrada dal miedi Johannes Pachinger», scriva il Spital regional Surselva en sia comunicaziun allas medias. Johannes Pachinger deriva dall'Austria, nua ch'el ha promoviu 2008 ella medischina humana e scienza da sport e pli tard sepperficiunau ella medischina generala. Silsuenter eis el vegniu en Svizra e sescolau il 2019 sco specialist per ortopedia e traumatologia. Duront sia scolaziun ha el luvrau al Spital cantunale da Sogn Gagl ed al Spital cantunale a Frauenfeld. Sco miedi specialist eis el staus engaschad al Spital universitar da Turitg, al Spital universitar da Basilea ed il davos alla Clinica ADUS a Dielsdorf.



Il team da miedis dall'ortopedia dil Spital regional Surselva, da sen. a dretg Richard Niehaus, Sebastian Ulsamer (caumiedi), e Johannes Pachinger.

FOTO MAD

Gia igl 1. d'october 2022 ei Richard Niehaus entrau sco miedi principal el Spital regional Surselva. El ei carschiu si en Tiaratudestga. All'universitad LMU a Minca ha el terminau 2014 sia studi e fatg in onn pli tard il doctorat. Sia scolaziun da miedi specialist ha el fatg al Spital dad Altdorf, alla Clinica universitara Balgrist a Turitg ed al Spital cantunale a Baden. Suenter haver promoviu sco miedi specialist per ortopedia e traumatologia ha el praticau leu sco miedi superiuor. A Baden ha el fatg experientschas surtut el sectur dalla chirurgia aviarta ed artroscopica dalla giugadira dil schanugl e dil schui.

Miedis giuvs

«Jeu hai grond plascher da nos dus giuvs miedis principals che completeschan nies team», declara il caumiedi dall'ortopedia al Spital regional Surselva, Sebastian Ulsamer. Ton dil punct da vesta professional sco era persunal selegri el che omisdu veglien secasar cun lur famiglias a liunga vesta en Surselva. «Sper nossas purschidas cumprovadas d'aulta qualid sco implantar giugadiras artificialas en cass d'artrosa, tractar blessuras d'accidents, cussegljar ed accompagnar sil sectur dalla medischina da sport, vegnin nus a porscher tractaments dalla chirurgia dil schui», declara il caumiedi. Ins vegli intensivar las operaziuns che mantegnien la giugadira oriunda dil schanugl inclus remplazzar ils ligioms. «Nus vegnin ad extender generalmein nies spectrum dall'ortopedia buc operativa», declara Sebastian Ulsamer, ella comunicaziun da medias dil Spital regional Surselva. (cdm/fmr)

FALERA

Prelecziun da Laura Schütz – per romontsch e tudestg

Il roman «Hotel Destin» ha Laura Schütz scret sco lavur da matura. La historia fa ina punt denter dus lungats e raqueta dallas perspectivias dallas duas protagonistas. Dumen-gia, ils 5 da fevrer 2023, allas 17.00 prelegia Laura Schütz el rom dallas prelecziuns dalla dumengia en La Fermata a Falera – per romontsch e per tudestg. L'entrada alla prelecziun cun apert ei gratuita.

Laura Schütz habitescha a Falera. Ella ei carschida si a moda bilingua cun romontsch e tudestg. Leger e scriver ein gia da pign ensi duas pissiuns dad ella. Il roman «Hotel Destin» ha la giuvna da 20 onns scret sco lavur da matura. Cunquei ch'ella ha buca saviu se decider denter il romontsch ed il tudestg, ha ella cumbinau quels dus lungats. Sia historia raqueta dallas entschattas dalla hotelaria el Grischun ord la perspectiva da duas giuvs che derivan da munds differents e discuoaran lungats differents. (cdm/fmr)



Laura Schütz prelegia en La Fermata a Falera.

FOTO MAD